



UNIVERSITÄTS-
BIBLIOTHEK
PADERBORN

Universitätsbibliothek Paderborn

**R. P. Richardi Arsdekin Soc. Jesu Sac. Theol. Professoris.
Apparatus Doctrinae Sacrae**

Archdekin, Richard

Dilingae, 1687

Caput 1. Praxis pro artificio Memoriae & dispositione Dictionis.

urn:nbn:de:hbz:466:1-38464



PARS PRIMA
 APPARATUS
 ET
 PRAXIS FORMÆ

PRO
 DOCTRINA SACRA
 IN CONCIONE PROPONENDA.

CAPUT I.

*Praxis pro artificio Memoriae, & dispositione
 Dictionis.*

I. **Q**onsultum est, si otium suppetat, præsertim pro incipientibus, totam Dictionem scripto deducere, & in tria aut plura puncta dividere: & memoria causa singula puncta concludere cum aliqua Sententia quæ habeat aliquam connexionem cum initio puncti sequentis.

Pro Concionatore impedito, aut multum exercitato, necesse est puncta saltem summam annotare, scribendo breviter præcipua capita & membra sui discursus; ut est sententia, exemplum, similitudo, & scopus sive fructus ad quem intendit Auditores pervolvere.

II. Artificium autem memoriae consistit in Imagine quadam rei dicendæ certo loco per imaginationem constitutenda, quæ dum recolitur, materiam, cum qua similitudinem habet, facile in memoriam reducit. Exempli gratia: Concipis Aulam aliquam cujus omnes partes, & partium ordinem optime notum & perspicuum habes. Si prima pars tuæ dictionis agat v.g. de Navigatione hujus vitæ ad portum salutis æternæ, ponis per Imaginationem in primo loco istius Aulae, Anchoram è tenui filo pendulam, ut eâ cognitâ, materia tua quæ est de navigatione, memoriae occurrat. Si secunda pars sit v.g. de Militia hominis contra tentationes mundi, pro ea secundo loco statuis militem gladium vibrantem. Si tertia pars sit, de Victoria tentationum, tertio loco appendis coronam: & sic pro reliqua materia, apponenda est imago aut signum, quod judicas maxime idoneum ad suscitandum vivam sequentis materiae memoriam. Et ideò utendum est imaginibus vividis, & aliquid agentibus, quæ possint animum tuum vivaciter ferire.

III. Alia praxis est, in margine dictionis descriptæ, quinque aut sex locis appingere quales dixi notas, cum

R.P. Ardeke. Tom. III.

diversis materiae partibus connexas; aut, quod facilius est: Vocabula diversa in margine scribere, quæ ordinem, & diversitatem materiae significant. Possuntque ea vocabula in unam sententiam, aut versum redigi, ut, sicubi memoria fallat, sententia illa indicet quousque ventum sit, & quid sequi debeat. Exemplum talis versus aut sententiæ sit, si disposuisti materiam de humilitatis præstantia: & illa v.g. fuerit. quam Deo grata, 2. quam homini jucunda, 3. quam utilis salutis æternæ: Redigas puncta illa ad unum brevem versiculum, aut sententiam v.g. *Grata Deo, jucunda homini, portusque salutis*: aut ad quamcumque idoneam simili ordine familiarem tibi sententiam: & sic in quavis materia, inde experieris à decursu materiae præparatæ memoriam non facile aberraturam.

IV. Si plura nomina propria certo ordine cupias retinere, redigantur ad voculam unicam, in qua tantum literæ primæ singulorum nominum suo ordine contineantur. Exempli gratiâ, ut retineantur nomina & ordo partium præcipuarum S. Scripturæ reducuntur ad hoc breve vocabulum, *GELNUDE*: G. Genesis, E. Exodus, L. Leviticus, NU. Numerorum, D. Deuteronomium, E. Evangelia Christi quatuor.

Sed quid si quis, fallente, aut turbata in dictione memoria, nihil omnino meminere eorum quæ ad dicendum paravit? remedium occurrendi tali accidenti præcipuum erit, paratum ante semper habere locum unum communem ad quem possit ex tempore recurrere. Talis præcipue locus esse poterit de *gloria celestis felicitate, æternitate, possessione omnis boni jucundi, utilis, honesti, & carentia omnis mali omnium sensuum qui continentur hoc versiculo, Gustus, odoratus, auditus, visus, tactus*, ut infra v. Gloria. Vel de *Inferni penis æternis singulorum istorum quinque sensuum*: quæ duo possunt ferè cum quacunque materia connecti; sin minus, melius est carere connexionem, quam omni dictione, ex duobus autem malis minus est eligendum.